

# Is Surat Ni Epustul Pablo Ziyà Te Menge TigPilipus

## Is Mehitenged te Surat he Para te Menge TigPilipus

Is belad ni Pablo migkedinahan ne ziyà itagkes te velad te sevaha he sundaru ziyà te pirusuwan. Netuenan din he ebpenhimetayan te hadì diyà te Ruma is menge tumutuu ne elin sikandin ebpekepaabut dutun. Piru minsan pa te iyan haazà melipayen gihapun sikandin. Maan?

Neloyaman ni Pablo is kepeselamat minsan hengkey is kebpekesavuk din su midsarig sikandin te Megbevayà wey netuenan din he ibegay kandin te Megbevayà is egkinehenganen din. Ne tenged kayi mibpevayèbayè en sikandin te Amey he Megbevayà iring te mid-ulaula zaan ni Jesus. Mid-isip ni Pablo he iyan utew impurtanti is kebpesakup ki Kristu, ked-iring te ked-isip-isip din wey tuyù din wey is utew kebpekeuvey kandin.

Nelihey si Pablo su sikan is menge etew he midtudluan din diyà te inged he Pilipus mibpedayun sikandan te kedtuu zan. Ne elin daan ingkelihey zin is: geine te wazè dan sikandin melipati. Mibpeuwitan dan sikandin te tavang hein edlised sikandin diyà te pirusuwan wey midsugù dan si Ipepruditu te kedisig kandin. Ne tenged te ebpedayun he kedsarig din ki Kristu wazà ebpekeegen te kelihey zin.

Is kepuun ni Pablo kedterebahu ziyà te Pilipus egkevasa ta ziyà te Nengeulaula 16:11-40.

---

**1** <sup>1</sup> Surat heini ni Pablo wey ni Timoteo te menge suluguen ni Jesu Kristu. Ibpeuwit heini is surat diyan te keniyu te langun he menge tumutuu ki Jesu Kristu he menge meginged diyan te inged he Pilipus wey te menge ebmegurangan niw wey menge diyekunu.

<sup>2</sup> Berakat he ikegagew kew te Amey tew he Megbevayà wey te Nengazen tew he si Jesu Kristu, ne vegayi kew zan te melinawen he kebpekesavuk.

### Is Ked-ampù ni Pablo

<sup>3</sup>Dekelà utew is kebpelesemi ku te Megbevayà tew tenged keniyu emun egkeisip ku sikiyu. <sup>4</sup>Ne emun id-ampù ku sikiyu utew a egkelipey <sup>5</sup>su egketenuzan ku is kedtevangi niw kediey te kedsengyawa ku te Meupiya he Tudtulanen puun pa te timpu zengan te kebpeketuu niw taman en guntaan. <sup>6</sup>Dutun he timpu mibpuunan te Megbevayà is meupiya he vaal zin he edhimuwen din diyan te keniyu. Ne netuenan ku he ebpeniguduwan din pa heini edhimuwa taman te egkepasad din keuzemà te andew te kedlikù ni Kristu. <sup>7</sup>Hustu iyan is ked-isipa ku keniyu te iring kayi su minsan ke pinirisu a wey ke kenà a pinirisu wey ke edsangyew a te Meupiya he Tudtulanen wey ke edtevaken ku is menge kuntada te Lalag te Megbevayà, mahal kew layun dini te gehinawa ku su pudu kiw ingkegagew te Megbevayà. <sup>8</sup>Ebpeketistigus is Megbevayà he utew zekelà is kebulunga ku keniyu su is kezekelà te gehinawa ku keniyu, ne iring te kezekelà te gehinawa ni Jesu Kristu keniyu.

<sup>9</sup>Ne id-ampù ku he med-iseg is kebpepurpurungè niw, is egketueni niw te menge ulaula te Megbevayà, wey is ketau niw te ked-isip <sup>10</sup>su wey niw layun metueni ke hengkey is hustu ne wey niw layun heini meulaula. Ne zutun wazà keuzemà igkesawey ziyen te keniyu su egkehimu kew he wagas dutun te kedlikù ni Kristu. <sup>11</sup>Ne zutun egkeveelan niw is minsan hengkey he metazeng he ulaula tenged te gehem he ibegey ni Jesu Kristu su wey mezalig wey mevantug is Megbevayà.

### Is Kedeliga ki Jesus Diyà te Minsan Hengkey he Egkeulaula

<sup>12</sup>Menge suled, egkesuatan ku he mesavut niw he is langun he meregen he nehitavù kediey, ne kenà mezaat, kekenà, meupiya, su neketavang kedì te kedsengyawa te Meupiya he Tudtulanen. <sup>13</sup>Su is langun he menge sundaru he guwardya zini te turugan te hadì wey is minsan hentei pa kayi, ne netuenan dan he mibpirisu a tenged dà te suluguen a ni Kristu. <sup>14</sup>Ne kenà duen dà taman su is kezekelan te menge zuma tew he tumutuu, ingkeheget te kedsarig dan te Nengazen heini is kebpirisuwa kedì. Ne tenged kayi ed-iseg is sigudu zan te kedsengyawa te Lalag te Megbevayà ne kenè dan en egkehandek.

<sup>15</sup>Is duma, ne iyan idsengyawa zan te impenurù ni Kristu is: tenged te nesina zan kediey ne wey e zan melewawi. Iyan, duen duma he iyan idsengyawa zan te menge penurù ni Kristu su igkesuat dan heini te ebpenudtul. <sup>16</sup>Ebpenudtul zan tenged te mahal a ziyà te gehinawa zan su netuenan dan he mibpili a te Megbevayà wey ku metavak is menge kuntada te Meupiya he Tudtulanen. <sup>17</sup>Iyan, is menge zuma, kenà meupiya is tuyù dan te kebentuga zan ki Kristu. Egkesuatan dan he melewawi e zan ne kunaan dan ke pinaagi kayi egkeumanan is menge samuk ku zini te pirusuwan.

<sup>18</sup>Iyan, nasi ku igkelipey heini is minge vaal zan su ke hustu is tuyù dan wey minsan ke mezaat, maambe en, asal mevantug dan si Kristu. <sup>19</sup>Kenà egkeawà is kelipey ku su netuenan ku he ibpaawà a kayi te pirusuan tenged te ked-empua niw kedì wey tenged te tavang te Wagas he Mulin-ulin he midtevangen din daan si Jesu Kristu. <sup>20</sup>Ne utew ku egkesuati, wey idsarig ku ziyà te Megbevayà he layun ku metuman is ebpeveelan din kedì su wey a kenà meeled te minsan keenu he timpu lavew en guntaan. Egkesuatan ku he mezalig si Kristu tenged kedì pinaagi te kebpaawaa kedì kayi te pirusuan ne emun kenà, ne mezalig si Kristu pinaagi te kebpatay ku. <sup>21</sup>Ne tenged te egkesuatan ku he mezalig si Kristu, egkesuatan ku he mebmelugayad pa is ked-ubpaubpè ku zini te kelibutan su wey mevantug ku pa si Kristu, iyan, ke ebpatay a ne lavew pa he ibmeupiya ku. <sup>22,23</sup>Kenè ku egketuenan ke hendei zapit is meupiya he ebpiilen ku, su egkesuatan ku he metapus en is ked-ubpaubpè ku zini te kelibutan wey a mekepekidume en ki Kristu su meupiya pa utew haazà. Iyan, ke zuen pa ebpeveelan kedì he ebplus, meupiya zaan. <sup>24</sup>Iyan, kinahanglan he kenè e pa ebpatay wey ku sikiyu metevangi. <sup>25</sup>Ne tenged te iyan heini netagù dini te gehinawa ku, netuenan ku he kenè pa egketapus is untung ku kayi te kelibutan ne ebpekiduma e pa keniyu wey ku mepurungi te edheget is kelipey niw tenged te kedtuu niw. <sup>26</sup>Ne zutun, ke ebpekeli kù ad diyana te keniyu egkehimu he iyan a igkeventuga niw ki Jesu Kristu.

<sup>27</sup>Menge suled, ke minsan hengkey is egkehita vù kediey, utew kinahanglan he is minge ulaula niw, ne kenà ebpekesuway te impenurù ni Kristu pinaagi te Meupiya he Tudtulanen. Su emun kenè kew edsuway kayi, minsan ke kenà a ebpekeli kù diyana, egketudtulan a he nesevaha is gehinawa niw wey tuyù niw te kedhagù su wey metuuwi te mezakel he minge etew is Meupiya he Tudtulanen. <sup>28</sup>Ne egketudtulan a zaan he kenè kew egkehandek te minge kuntada niw. Su emun kenè kew egkehandek kandan egkesavut dan he iyan sikandan edsilutan ne iyan kew ebegayan te untung he wazè din pidtemanan su ibpesavut kandan heini te Megbevayà. <sup>29</sup>Su is mibpeveelan keniyu te Megbevayà, ne kenà iyan dà is kedtuuwi niw ki Kristu, kekenà, elin daan is ked-entusa niw te kemeresayan tenged te kedtuu niw kandin. <sup>30</sup>Nekederagkes kiw en is ed-antus te kemeresayan tenged te Meupiya he Tudtulanen. Ne heini is minge kemeresayan he nehita vù kediey zengan, ne kemulu guntaan kenè ku egkesuway, sumalà is nezineg niw.

### Is Kineiya ni Jesu Kristu

**2** <sup>1</sup>Menge suled, netuenan ku he ingkeheget te kedtuu niw is kebpekidsevaha niw ki Kristu, ne netuenan ku zaan he naawà is minge keseengan niw mehitedged te hizu zin keniyu. Ne netuenan

ku zaan he neupakat kew pinaagi te Wagas he Mulin-ulin, ne ebpekedhihizuwè kew wey ebpelimlimuey kew is menge tumutuu. <sup>2</sup>Ne tenged kayi te langun edhengyuan ku sikiyu he tuguti niw he mepurung mesevaha is isip niw wey gehinawa niw, ne hegeta niw is kebmahala niw ziyà te gehinawa niw te menge zuma niw. Ne emun ed-ul-ulahan niw heini human egkeheget is kelipey ku tenged keniyu. <sup>3</sup>Kinahanglan he kenà kew mebpekidlawan ne kenè kew mebpelavew, kekenà, isipa te minsan hentei keniyu he minus is pid-etawan din kenà te zuma zin. <sup>4</sup>Kenè niw iyan dà isipa is keniyu he egkinehenglanen, kekenà, isipa niw zaan is egkinehenglanen te menge zuma niw. <sup>5</sup>Kinahanglan he iring is isip niw te isip ni Jesu Kristu.

<sup>6</sup>Su minsan ke kenà egkeawà diyà te kandin is kegkemegbevayè din wazè din

isipa he kenè din ed-ewaan is kebpekesavuk din te zekelà is kegehèm din he Megbevayà,

<sup>7</sup>kekenà, mid-ewaan din ne mibpaanak te etew, ne nehimu he suluguen te Megbevayà.

<sup>8</sup>Ne zutun te etew en sikandin wazà sikandin mebpelavew, kekenà, mibpezumazuma sikandin te menge sugù kandin te Amey zin he Megbevayà minsan pa te pinaagi kayi inransang sikandin te krus ne zutun mibpatey.

<sup>9</sup>Ne tenged kayi midhimu en sikandin te Megbevayà he utew lavew, ne migeraran din sikandin te gerar he lavew pa te minsan hengkey he gerar te minsan hentei.

<sup>10</sup>Ne umba mid-ulaula heini te Megbevayà su ke egkezineg is gerar ni Jesus,

ed-ezapen si Jesus te minsan hentei he linimbag he ziyà te langit wey zini te tanà,

wey minsan diyà te Iveyaan. Ebpekeluhud dan kandin,

<sup>11</sup>ne ebpekekagi zan he iyan si Jesu Kristu Nengazen te minsan hengkey.

Ne pinaagi kayi egkevantug dan daan is Amey tew he Megbevayà.

### Is Sulù Dini te Kelibutan

<sup>12</sup>Ne umba, menge suled, iring te layun kew ebpememineg te menge sugù ku, ne kenà dutun dà te kebpekiduma ku keniyu, kekenà, minsan te wazà a ziyàn te keniyu, ne iring din ded daan guntaan kinahanglan is uman sevaha keniyu, ne himuwa zin is taman te egkehimu zin he edumahan te kegkehandek te Megbevayà su wey mepasad haazà is nepuunan en te Megbevayà te kedlibriya zin keniyu te silut. <sup>13</sup>Su layun edtavang keniyu is Megbevayà wey niw mesuati ne wey niw mehimu is kedtumana te tuyù din diyan te keniyu.

<sup>14</sup>Is langun he ebpeveelan din keniyu, tumana niw te wazà kebpenemudtemud wey kebelivad. <sup>15</sup>Ne zutun, wazà mezaat diyan te keniyu su meupiya is ulaula niw su menge anak kew te Megbevayà he wazà igkesewayi zin keniyu, minsan te zini kew pa mekeubpà te kelibutan te teliwazà te lalung he menge etew he kenà memetazeng is menge ulaula. Iring kew te menge sulù <sup>16</sup>he edtayew kandan su ibpesavut niw kandan is lalag he ebpekevegey kandan te untung he wazà pidtemanan. Ne emun iyan heini ed-ul-ulahan niw, utew ebmeupiya is gihinawa ku keuzemà dutun te andew te kedlikù ni Kristu su egketuenan ku zutun he zekelà is pulus te kedhagù ku ziyàn te keniyu.

<sup>17</sup>Is kedtuu niw te Megbevayà, ne iring te pemuhāt he edewaten din. Ne emun egkesuatan din pa he id-uman is kebpatēy ku kayi te pemuhāt, igkelipey ku pa. Ne igkelipey ku zaan is kedtuu niw iring te nelipey kew. <sup>18</sup>Ne iring din ded daan, kinahanglan he igkelipey niw zaan is kebpatēy ku emun egkehitavù kediey.

#### Si Timoteo wey si Ipepruditu

<sup>19</sup>Dekelà is kedsarig ku te Nengazen tew he si Jesus he megaan ku en egkesugù diyan te keniyu si Timoteo. Ne emun ebpekeliikù en dini, egketuenan ku ke hengkey is kebpekesavuk niw. Ne utew heini ibmeupiya te gihinawa ku. <sup>20</sup>Iyan dā sikandin duma ku kayi he utew zekelà is gihinawa zin keniyu. <sup>21</sup>Is duma, ne iyan dā egkeisip dan is kandan dā he egkesuatan, ne kenà iyan is egkesuatan ni Jesu Kristu. <sup>22</sup>Si Timoteo, netuenan niw he hustu is menge ulaula zin. Iring sikandin te tutuu he anak ku te kedtevangi zin kedì te kedsengyawa kayi te Meupiya he Tudtulanen. <sup>23</sup>Umba, emun egketuenan ku en ke hengkey is egkehitavù kedì kayi, egkesuatan ku he segugunè ku sikandin mesugù diyan. <sup>24</sup>Ne zekelà daan is kedsarig ku te Megbevayà he megaan a zaan ebpeketelukun kandin.

<sup>25</sup>Ne elin daan kayi te isip ku he kinahanglan he ibpēhendiyān ku is suled tew he si Ipepruditu, kes midsugù niw pēhendini wey e zin metevangi. Iyan sikandin duma ku wey timbang ku kayi te ebpeveelan kedì te Megbevayà. <sup>26</sup>Umba ibpēhendiyān ku su utew sikandin ebulunga keniyu ne utew inmezaat te gihinawa zin is nezineg niw he tudtul he nezeruwan sikandin. <sup>27</sup>Netigbak iyan sikandin is midaru umba kunaan ku ke ibpatēy zin en, iyan, nehizuwan sikandin te Megbevayà. Ne nehizuwan a zaan te Megbevayà su ke mibpatēy sikandin, neumanan en geina is menge seeng ku. <sup>28</sup>Umba utew ku egkesuati heini is ked-ulì din diyan su wey kew melipey te kebpekeuma zin ne pinaagi kayi egkeawā daan is kedì he kegkeseeng. <sup>29</sup>Umba, kinahanglan he megalew kew te kebpekeuma zin su suled tew sikandin tenged te kedtuu zin te Nengazen. Is langun he iring kayi he etew, tehuza niw <sup>30</sup>su hapit sikandin ebpatēy

wey zin metuman is ebpevelan kandin ni Kristu. Inserakan din is untung din wey e zin metevangi su zutun he timpu kenà a keniyu egketevangan.

### Is Tutuu he Kegkemetazeng

**3** <sup>1</sup>Na, minge suled, ketepusan heini he sambag ku keniyu. Lipey kew tenged te upakat niw te Nengazen. Maambe ke idsubli ku keniyu is daan he sambag ku su melemu zà heini, ne kela ke egkehimu he pinaagi kayi egkelig-enan is isip niw. <sup>2</sup>Likayi niw is minge kuntada te Megbevayà he mezaat is ulaula zan he iyan is minge Hudiyu he ebpenurù he iyan egkesuatan te Megbevayà is kebpelii niw te lawa niw. <sup>3</sup>Iyan kiw kes tutuu he minge sakup te Megbevayà, ne kenà iyan sikandan, su pinaagi te Wagas he Mulin-ulin ed-azap kiw te Megbevayà ne edlipey kiw tenged te upakat tew ki Jesu Kristu. Ne kenè tew iyan edserigan is kelibutanen he ulaula iring te kebpsirkunsidar. <sup>4</sup>Iyan, ke egkehimu he egkeserigan is iring dutun, egkeserigan is nengeulaula ku zengan su ke zuen etew he kunaan din ke egkeserigan din is kedtumana zin te minge kelibutanen he tulumanen, ne egkelevawan ku pa sikandin te kedtumana kayi. <sup>5</sup>Su hein walu en he andew is ked-enaka kedì, ne midsirkunsidar a. Is minge ginikanan ku, ne kevuwanan sikandan ni Benjamin he anak te kepuun dey he si Israyil. Ne tudalis a he Hudiyu. Mibpurungan ku te edtuman is kesuguan he imbilinbilin ni Moises su Perisiyu a. <sup>6</sup>Ne tuus te utew meheget dini te gehinawa ku is kedtumana ku te minge tulumanen dey te minge Hudiyu, su mibpemesipelahan ku is minge tumutuu ki Jesus. Ne sumalà te kedtumana ku te kesuguan he imbilinbilin ni Moises wazè ku netuenan he supak ku te Megbevayà. <sup>7</sup>Iyan, is langun he iring dutun he kunaan ku ke egkeserigan ku wey a melibri te silut, mid-engkezan ku en wey ku maangken si Kristu. <sup>8</sup>Ne kenà dutun dà taman is mid-engkezan ku, kekenà, mid-eminan ku engkezi is minsan hengkey he zekelà dini te gehinawa ku su wey ku mekuwa is utew pa lavew he mahal he iyan is kebpekidsevaha ku ki Jesu Kristu te Nengazen ku. Tenged kandin mid-engkezan ku is langun ne mid-isip ku heini he abper zà dini te kelibutan wey a mekepekidsevaha ki Kristu, <sup>9</sup>su wey a zaan meisip te Megbevayà he metazeng tenged ki Kristu. Wazà a meisip he metazeng pinaagi te kediey zà he ulaula te kedtumana te kesuguan, su mibpeketazeng a te Megbevayà pinaagi te kedtuu ku ki Kristu. Heini is kebmetazeng, ne idtuvad kenita te Megbevayà emun edtuu ki ki Kristu. <sup>10</sup>Iyan dà guntaan ibmeupiya te gehinawa ku is kegketueni ku te minge ulaula ni Kristu wey is kebulusi kedì te gehem he iyan sikan is gehem he ingkevanhew zin. Egkesuatan ku he mekeambit a zaan duen te kemeresayan he mid-antus din he iyan is ked-engkezi ku te kediey he egkesuatan iring te kandin he kebelevaga te untung din. <sup>11</sup>Umba egkesuatan ku heini su wey mehimu he mevanhew a keuzemà.

<sup>12</sup>Kenè ku iyan ibpesavut kayi he netuman en dini te kedì heini is langun wey ke nehimu e en he etew he wazè en duen igkesawey, kekenà, ebpenigudu a wey heini metuman su iyan heini tuyù ni Jesu Kristu zutun te kedhimuwa zin kedì he sakup din. <sup>13</sup>Netueanan ku, minge suled, he wazè pa heini metuman dini te kedì, iyan, mid-awè ku ziyà te isip ku is nengehuna he nengetuman ku en, ne edhimuwen ku is taman te egkehimu ku wey ku mekuwa is langun he egkesuatan te Megbevayà he mekuwa ku keuzemà. <sup>14</sup>Ebpenigudu e pa wey ku mekuwa is suhul te Megbevayà su iyan heini ketezengan ke maan is mid-umew kiw zin te ked-angken te untung he wazà pidtemanan pinaagi te kebpekidsevaha tew ki Jesu Kristu.

<sup>15</sup>Ne is langun te sikitew he megurang en te kedtuu, kinahanglan he iring kayi zaan is isip tew wey gehinawa tew. Iyan, emun kenè kew egkengeuyun ibpetueanan keniyu te Megbevayà is benar. <sup>16</sup>Iyan, kinahanglan guntaan he edtumanen tew is daan he impenurù kenitew te Megbevayà.

<sup>17</sup>Is langun te sikiyu, minge suled, purungi niw te ed-iring heini is minge ulaula ku. Iyan niw zaan iringi haazà is minge etew he iring is minge ulaula zan te kenami he ulaula. <sup>18</sup>Dengan ku zà heini layun egkegiya, iyan, guntaan ed-umanan ku egkegiya zuma is minge luhè ku he ebpenigis, tenged te mezakel he minge etew he egkegiyen dan he sakup sikandan ni Kristu, iyan, egketuusan pinaagi te ulaula zan he kuntada sikandan te kebpesevuta mehitenged te kebpehimatey ni Kristu ziyà te krus. <sup>19</sup>Siguradu egkeimpirnu sikandan su iyan ebayàbayà kandan is minge mezaat he kebaya te lawa zan. Ibmeupiya te gehinawa zan is minge mezaat he ulaula, iyan, meupiya pezem ke igkeeled dan; ne iyan dan dà egkeisip is minge vutang he zini te kelibutan. <sup>20</sup>Ne sikitew mulà, ne iyan hustu he inged tew is diyà te langit ne utew zekelà is perateng tew te kedlikù te Menluluwas tew he ebpuun diyà te langit he iyan is Nengazen tew he si Jesu Kristu. <sup>21</sup>Ne zutun te andew, ne edhelinen din en is memeguyà he minge lawa tew ne edhimuwen din he iring te mekegegehem he lawa zin. Ne kayi te kedhelina zin kenitew, egemiten din is dekelà he gehem din he iyan ingkehimu zin he ebayàbayà te minsan hengkey.

#### Is Minge Telaan ni Pablo

**4** <sup>1</sup>Umba minge minahal ku he minge suled, hegeta niw is kedtumana niw te minge sugù te Nengazen. Utew a mibulung keniyu. Igkelipey ku sikiyu wey ibmeupiya kew te gehinawa ku.

<sup>2</sup>Edhengyuan ku sikiyu, Ibudya wey Sintiki, he melinew is kebpekid-upakat niw su telesuled kew tenged te upakat niw te Nengazen. <sup>3</sup>Ne sikew zaan is timbang ku ziyang, egkesuatan ku he tevangi nu heini is

menge vahi wey zan heini metuman su mibpenigudu zan te kedtavang kedi te kedsengyawa ku te Meupiya he Tudtulanen. Ne elin daan si Clemente wey zuen pa menge zuma niw he midtavang kedi. Is menge ngazan dan te langun, ne nekesurat en diyà te libru te Megbevayà he zutun inlista zin is mibegayan te untung he wazè din pidtemanan.

<sup>4</sup>Egkegiyan ku sikiyu he sigudu kew lipey tenged te kebpekidsevaha niw te Nengazen, su meupiya ke zekelà layun is kelipey niw.

<sup>5</sup>Kinahanglan he peketulanged kew te minsan hentei su megaan en edlikù is Nengazen. <sup>6</sup>Kenè niw ikeseeng is minsan hengkey he egkeulaula niw, kekenà, emun ed-ampù kew buyua niw ziyà te Megbevayà is egkinehnglanan niw ne emun ebuyù kew, ne kinahanglan he peselemati niw en he zaan. <sup>7</sup>Ne zutun wazà samuk diyà te isip niw wey gehinawa niw su pinaagi te kebpekidsevaha niw ki Jesu Kristu ibegey keniyu te Megbevayà is melinawen he gehinawa he kenà egkesavut te minsan hentei he etew.

<sup>8</sup>Ketepusan heini, menge suled, he menge lalag ku keniyu. Iyan niw itagù diyà te isip niw is meupiya, is dait he igkezeligi, is tutuu he tuluuwen, is metazeng wey hustu wey mekempet he ulaula, wey is minsan hengkey he igkehimu te minsan hentei he egketahud.

<sup>9</sup>Pen-ul-ulaha niw heini is langun he impenurù ku, wey impesavut ku keniyu pinaagi te menge lalag ku wey pinaagi zaan te menge ulaula ku. Ne zutun, is Megbevayà he iyan puunà te kelinew tew te wazè din pidtemanan, iyan ed-ulin keniyu.

### Is Kedtevangi ki Pablo

<sup>10</sup>Uteu zekelà is kelipey ku wey is kebeselemati ku te Nengazen su nehimu en maan he ingkepeehè niw is gagew niw pinaagi kayi te impeuwit niw kedi. Kenè ku iyan ibpesavut keniyu he wazè niw gagew kedi dutun te nengehuna he timpu, kekenà, wazè niw pa zutun paagi wey niw ikepaahà is gagew niw. <sup>11</sup>Kenà iyan igkegiya ku kayi is tenged te zuen kurang ku te menge egkinehnglanan ku, su minsan ke kenà utew meupiya is kebpekesavuk ku, impenurù kedi te Megbevayà he kinahanglan he mebmeupiya gihapun is gehinawa ku. <sup>12</sup>Nesegazan ku en is kegkealang-alang wey is neezenan te langun he egkinehnglanan ku. Ne neleyaman ku en heini he egkeulaula te minsan hendei wey te minsan keenu, se zuen keuyagan ku se wazè ku keuyagan, ke neezenan a wey ke egkealang-alang a. <sup>13</sup>Egkehimu ku is minsan hengkey he ibpeulaula kedi tenged te tavang ni Kristu he iyan edlig-en kedi.

<sup>14</sup>Ne minsan pa te iyan heini, utew kew metulanged su midtevangian a keniyu kayi te menge seeng ku he mezakel. <sup>15</sup>Sikiyu is menge tigPilipus, netuenan niw he zutun te kedhipanew ku puun diyan te prubinsya he Mesidunya hein aney ku en ipenudtul ziyàn is Meupiya he Tudtulanen,



iyang kew zà munge tumutuu he midtavang kedì. Wazà duma he gurupu te munge tumutuu he nehimu he munge timbang ku su iyang kew zà nekevegey kedì te selapì. <sup>16</sup>Ne hein diyè e pa te Mesidunya, diyà te inged he Tiselunika, ne layun kew ebpeuwit te tavang niw kedì. <sup>17</sup>Kenè ku iyang igkekegiya kayi su wey a layun mekezawat te ibegey niw, kekenà, egkesuatan ku he zekelà is suhul keniyu te Megbevayà. <sup>18</sup>Nezawat ku en is impeuwit niw ne utew subra is imbegey niw. Ne kenà ad egkealangan su inhated en ni Ipepruditu zini is idtavang niw kedì. Iring heini te pemuhut he utew mehemut, he ke vâ dà egkegiya, utew igkesuat te Megbevayà. <sup>19</sup>Ne is Megbevayà, iyang daan ebegey keniyu te langun he kinahanglan niw tenged te kebpekidsevaha niw ki Jesu Kristu su utew zekelà is ketigeyunan din. <sup>20</sup>Berakat he zeliga is Amey tew he Megbevayà te wazà pidteman.

### Menge Pengemusta

<sup>21</sup>Ebpengemusta a keniyu te langun he munge tumutuu ki Jesu Kristu ziyang. Is munge suled tew he zuma ku kayi, ebpengemusta zan daan keniyu. <sup>22</sup>Ne is langun he munge zuma ku he tumutuu kayi te inged, lavew en is munge suled tew he zini ed-ubpà te valey te hadi, ebpengemusta zan daan keniyu.

<sup>23</sup>Berakat he ikegagew kew is langun te Nengazen tew he si Jesu Kristu. Iyang a si Pablo.